

YOURS'17: KE ARAH ASPIRASI BELIA MASA HADAPAN

ZAINAH SHARIFF, SYARIFFANOR HISHAM & SHARIFFAH MAMAT

ABSTRAK

Artikel ini bertujuan untuk merumuskan artikel-artikel penyelidikan yang telah dibentangkan sewaktu Seminar Penyelidikan Belia Kebangsaan (YOURS) anjuran Institut Penyelidikan Pembangunan Belia Malaysia (IYRES) pada 6-7 November 2017 bertempat di Putra World Trade Centre (PWTC), Kuala Lumpur. Seminar tersebut telah mengumpulkan sejumlah 40 hasil penyelidikan yang dirangkumkan mengikut lima (5) subtema iaitu Sosial, Identiti, Ekonomi, Pendidikan dan Kesihatan yang mengkhusus dalam bidang pembangunan belia. Seramai 256 orang peserta yang terdiri daripada ahli akademik, pelajar Institusi Pengajian Tinggi (IPT), warga pendidik, wakil Kementerian/Jabatan/Agensi, NGO dan individu perseorangan telah hadir. Hasil penyelidikan yang dibentangkan telah memberi manfaat kepada pelbagai pihak secara langsung mahupun tidak langsung disamping membina jaringan hubungan di antara peserta dan pembentang. Sehubungan itu, hasil kajian-kajian tersebut diterbitkan dalam *Malaysian Journal of Youth Studies (MJYS)* untuk memberikan manfaat kepada pelbagai pihak yang berkepentingan dalam ruang lingkup pembangunan belia di Malaysia.

Kata Kunci: Sosial, Identiti, Ekonomi, Pendidikan, Kesihatan, Belia & YOURS

ABSTRACT

This article summarizes the research papers presented in the National Youth Research Seminar (YOURS) organized by the Institute for Youth Research Malaysia (IYRES) on November 6-7, 2017 at the Putra World Trade Center (PWTC), Kuala Lumpur. The seminar has compiled 40 research papers categorized into five (5) subthemes i.e. Social, Identity, Economics, Education and Health focusing on youth development. A total of 256 participants comprising academicians, students of Higher Learning Institution, educators, representatives of Ministries/ Departments/ Agencies/ NGOs and individuals participated in this event. The research papers presented in YOURS'17 are beneficial to various parties and network between participants and presenters was well established. Thus, the research papers published in *Malaysian Journal of Youth Studies (MJYS)* benefit youth development stakeholders in Malaysia.

Keywords: Social, Identity, Economic, Education, Healthy, Youth & YOURS

PENGENALAN

Institut Penyelidikan Pembangunan Belia Malaysia (IYRES) menerbitkan Edisi Khas *Malaysian Journal of Youth Studies (MJYS)* bersempena penganjuran Seminar

Penyelidikan Belia Kebangsaan (YOURS) pada tahun 2017. Seminar tersebut telah berjaya mengumpulkan ahli akademik dan penyelidik sosial dalam sesi perkongsian hasil dapatan penyelidikan. Sejumlah 40 kertas penyelidikan telah dibentangkan dalam seminar selama dua (2) hari bertempat di PWTC, Kuala Lumpur. Bertemakan “Ke arah Aspirasi Belia Masa Hadapan”, seminar tersebut telah mengumpulkan artikel-artikel mengikut lima (5) subtema iaitu Sosial, Identiti, Ekonomi, Pendidikan dan Kesihatan khusus dalam membincangkan tentang isu-isu belia Malaysia.

Trend Sosial Belia dan Penyelesaian

Subtema Sosial mendominasi penyertaan pembentang dengan penyertaan yang paling ramai. Subtema ini dikategorikan kepada empat (4) kategori iaitu: Penggunaan Media; Tingkah Laku Belia Berisiko; Cabaran Belia Minoriti dan Terpinggir; serta Sukan dan Kesukarelaan. Subtema Sosial bagi kategori media mengupas isu tentang peningkatan penglibatan belia berisiko dan terpinggir terhadap penggunaan media. Sehubungan itu, wujud keperluan untuk meningkatkan kefahaman, pengetahuan, kesedaran dan literasi belia dalam aspek keselamatan privasi maklumat peribadi belia ketika menggunakan rangkaian internet atau persekitaran digital (Mohd Azul, 2017). Saranan saintis sosial agar pelbagai pihak yang terlibat dalam industri media memastikan kandungan sesuatu siaran media disebarkan bersesuaian dengan kategori umur. Hal ini penting bagi memastikan pengaruh terhadap kandungan media yang negatif tidak meresap kepada kelompok usia yang belum sesuai untuk menerima sesuatu bentuk maklumat (Mohd Sobhi, 2015).

Kategori kedua dalam subtema Sosial adalah tingkah laku belia berisiko. Hasil kajian yang dibentang menunjukkan kini wujud keperluan untuk memberi fokus bagi membendung golongan belia terlibat dalam tingkah laku berisiko. Pendekatan ini selaras dengan tindakan yang lebih berbentuk mencegah dari merawat kegawatan sosial dalam kalangan belia Malaysia. Saranan-saranan hasil kajian memberi fokus dalam memupuk sifat integriti dan efikasi dalam diri golongan belia bagi mengelakkan terlibat dalam aktiviti berisiko serta memupuk tingkah laku prososial agar dapat memberi manfaat kepada komuniti dan masyarakat (Noor Shahirah, Azlina & Nobaya, 2017). Pendekatan berbentuk kerohanian dalam membantu belia memahami diri dengan lebih dekat dan mengetahui langkah-langkah pencegahan juga merupakan sebahagian daripada cadangan bagi mengelakkan belia Malaysia terlibat dalam apa juga bentuk gejala sosial bermula di peringkat awal persekolahan.

Cabaran belia minoriti merupakan fokus ketiga di bawah subtema sosial. Dapatan kajian menyarankan agar belia minoriti dan terpinggir seperti: belia cacat penglihatan diberi perhatian dari aspek pengurusan yang efektif seperti kepimpinan dan pengurusan; publisiti dan penyampaian maklumat (berbentuk *outreach* seperti advokasi); penambahbaikan kemudahan pengangkutan baharu; serta sokongan dari masyarakat (Wong & Lim, 2017).

Selain itu, isu yang turut dibincangkan di dalam sesi selari adalah berkaitan aktiviti sukan kepada orang kelainan upaya. Sokongan daripada sudut psikososial

menjadi keperluan dalam membantu sukan OKU. Para atlet OKU dilihat mempunyai potensi besar jika mereka berada dalam kumpulan berbanding secara individu (Manisah, 2014). Sehubungan itu, pelbagai pihak harus bekerjasama secara kolektif dalam membantu mereka termasuklah dalam menambahkan kepelbagaian aktiviti-aktiviti sukan OKU.

Kategori terakhir bagi subtema sosial adalah sukan dan kesukarelaan. Dapatan kajian menyarankan agar generasi muda melibatkan diri dalam kegiatan sukan dan aktiviti kesukarelaan. Hal ini adalah kerana pihak Kementerian Belia dan Sukan (KBS) telah melaksanakan pelbagai usaha bagi menarik penyertaan golongan belia. Penglibatan secara aktif sebagai sukarelawan menjadi pemangkin dalam melestarikan semangat patriotisme dalam kalangan belia (Hapsah *et. al.*, 2017). Dapatan kajian juga menyarankan agar golongan belia diberikan kefahaman secara teori dan praktis berkaitan semangat kesukarelaan. Daripada perspektif sukan pula, kajian menyarankan agar pembangunan kerjaya seseorang atlet disokong secara langsung daripada ibubapa, juru latihan, rakan dan pihak kerajaan (Fatimah *et. al.*, 2017).

Perlambangan Identiti Belia Malaysia

Subtema kedua dalam seminar adalah perlambangan identiti belia Malaysia yang pelbagai latar belakang, budaya, gaya hidup dan ini menjadikan belia Malaysia sangat unik. Tema identiti dikategorikan kepada pemerksaan belia dan pembangunan belia positif.

Hasil kajian menyarankan agar belia wajar terlibat secara aktif dengan komuniti sebagai sebahagian daripada sumbangan semula kepada komuniti yang telah membentuk peribadi mereka (Ismi *et. al.*, 2017). Secara tidak langsung, melalui hubungan erat dengan komuniti berupaya menyemai nilai-nilai murni dalam melahirkan modal insan berkualiti dan bermoral tinggi.

Manakala bagi kategori pembangunan belia positif, hasil kajian menekankan penglibatan belia bersifat *sense of community* dengan sokongan belia-dewasa secara *giving back to community* (Steven *et. al.*, 2017). Sementara itu, Indeks Belia Malaysia (IBM) yang dibangunkan oleh IYRES menjadi pengukur bagi melihat tahap kualiti dan kesejahteraan hidup belia (Mohd Rizal, 2016). Pendekatan pembangunan belia positif ini juga bersandarkan kepada Dasar Belia Malaysia (DBM) yang turut dijadikan input dalam pembentukan Pelan Tindakan Pembangunan Belia 2016-2020.

Pendidikan (Akademik dan Teknikal)

Pembentangan kertas penyelidikan dengan subtema pendidikan (akademik dan teknikal) mencadangkan agar peluang yang lebih luas diberikan kepada generasi belia untuk memegang jawatan utama (Pengerusi, Setiausaha dan Bendahari) di peringkat pengurusan koperasi di Malaysia. Hal ini adalah kerana faktor kepimpinan merupakan faktor bagi mendorong penglibatan selain faktor dorongan (Mohd

Haniff *et. al.*, (2017). Selain itu, kajian mendapati penganjuran aktiviti yang lebih interaktif dan ganjaran menarik dapat menggalakkan penglibatan golongan belia dalam gerakan koperasi.

Seterusnya melalui kaedah *Small Sided Game* (SSG) berupaya memodifikasi bilangan pemain, saiz padang dan arahan jurulatih juga menunjukkan kesan signifikan terhadap kemahiran asas pemain-pemain hoki dalam meningkatkan kemahiran atlet. Menerusi teknik SSG yang merupakan inovasi kaedah latihan terbukti membantu meningkatkan kemahiran asas dalam latihan sukan (Mohd Aras, Mohd Taib & Norlena, 2017).

Pemeriksaan Ekonomi Belia

Pembentangan kertas penyelidikan berkaitan subtema ekonomi mendapati bahawa pada masa kini menjadi keperluan untuk mewujudkan pengurusan kemiskinan belia melalui modal komuniti dalam usaha mendayaupayakan belia miskin (Wan Ahmad, Hafizi, Siti Asma & Mohd Kamil, 2017). Keusahawanan dalam kalangan wanita juga wajar diberikan peluang dengan penekanan kepada keperluan seperti motivasi, latihan dan sokongan kewangan. Malah dengan menceburkan diri dalam keusahawanan sosial juga dapat membantu membentuk peribadi belia wanita yang mempunyai kualiti kepimpinan yang tinggi (Shakirah & Nurshafeeqah, 2017).

Kesihatan

Bagi subtema kesihatan pula penyelidikan menyarankan agar golongan belia digalakkan mengambil makanan seimbang dan teratur serta memantau tahap kesihatan diri sendiri serta ahli keluarga (Norashikin, Norazilah & Ismarulyusda, 2017). Manakala bagi pihak kerajaan, wujud keperluan untuk mengadakan kempen penyampaian maklumat mengenai penjagaan kesihatan dan membuat penilaian literasi kesihatan rakyat Malaysia secara keseluruhannya.

RUMUSAN

Berpandukan kejayaan pelaksanaan YOURS'17, sekali lagi IYRES akan melaksanakan YOURS pada tahun 2018 dengan membawa tema-tema yang lebih dekat dengan golongan belia untuk manfaat pelbagai pihak. Penganjuran ini bertepatan dengan fungsi dan peranan IYRES bagi menyediakan platform untuk membenteng dan menyebarkan hasil kajian serta mewujudkan medan perbincangan ilmiah berkenaan isu-isu pembangunan belia.

RUJUKAN

- Fatimah Wati Halim, Aizan Sofia Amin, Norhayati Ibrahim, Noordeyana Tambi, Mohammad Rahim Kamaluddin, Khairul Anwar Mastor, Rozainee Khairudin, Murniyati Mamat, Mastura Mohamad dan Norhidayah Omar. (2017). *Profil Psikologi Sukarelawan Sukan SEA Ke-29 dan Impaknya terhadap Tingkahlaku Kesukarelawan Berkesan*. Universiti Kebangsaan Malaysia (UKM), Bangi. Putrajaya.
- Hapsah Md Yusof, Nur Afifah Baharum, Nurul Ain Mohd Daud, Norazani Ahmad & Fauziah Mohd Saad. (2017). *Penglibatan Belia dalam Aktiviti Sukarelawan di Malaysia: Satu Ulasan Analisis Sistematis*. Universiti Perguruan Sultan Idris (UPSI), Tanjung Malim. Perak.
- Institut Penyelidikan Pembangunan Belia Malaysia. (2017). *Buku Program Seminar Penyelidikan Belia Kebangsaan 2017*. Putrajaya.
- Ismi Ariff Ismail, Dzuhaulmi Dahalan, Steven Eric Krauss, Haslinda Abdullah, Zuraidah Ali, Zaifu Ariffin & Shepherd Zeldin. (2017). *Keterikatan Komuniti ke arah Merealisasikan Pendekatan Pembangunan Belia Positif dalam Dasar Belia Negara*. Universiti Putra Malaysia (UPM), Serdang. Selangor.
- Kementerian Belia dan Sukan Malaysia. (2015). *Dasar Belia Malaysia*. Putrajaya: Bahagian Dasar dan Strategik, Kementerian Belia dan Sukan Malaysia.
- Manisah Mohd Ali. (2014). *Psychosocial Impact on the Participation of Youth with Disability in Sports Activities*. National University of Malaysia, Bangi. Selangor.
- Mohd Aras Khamis, Mohd Taib Harun & Norlena Salamuddin. (2017). *Kesan Small Sided Game (SSG) terhadap kemahiran Asas dan Kemahiran Membuat Keputusan Pemain-pemain Hoki*. Universiti Kebangsaan Malaysia (UKM), Bangi. Selangor.
- Mohd Azul Mohamad Salleh. (2017). *Kesedaran Belia Terhadap Privasi dan Keselamatan dalam Penggunaan Media Sosial*. Universiti Kebangsaan Malaysia (UKM), Bangi. Selangor.
- Mohd Haniff Mohd Hashim, Aishah Ariffin, Shamsul Khairi Abu Hassan, Rosidah Rashid, Mohd Fitri Ab Rahman & Azirah Baharudin. (2017). *Penglibatan Belia dalam Pengurusan Tertinggi Koperasi*. Maktab Koperasi Malaysia.
- Mohd Sobhi Ishak. (2015). *Penggunaan Televisyen dalam kalangan Belia Malaysia: Sejauhmana kerelevanannya*. Universiti Utara Malaysia (UUM). Sintok. Kedah.
- Mohd Rizal Mohd Sham. (2016). *Kajian Penilaian Outcome Indeks Belia Malaysia 2016*. Institut Penyelidikan Pembangunan Belia Malaysia (IYRES). Kementerian Belia dan Sukan Malaysia (KBS). Putrajaya.

- Noor Shahirah Muhammad Nizam, Azlina Mohd Khir & Nobaya Ahmad. (2017). *Efikasi Kendiri dan Kecenderungan Tingkahlaku Prososial dalam kalangan Mahasiswa Selangor*. Universiti Putra Malaysia (UPM), Serdang. Selangor.
- Norashikin Abdul Manan, Norazilah Mohd Roslan & Ismarulyusda Ishak. (2014). *Tingkahlaku Pengambilan Sarapan Pagi dalam kalangan Remaja*. Institut Penyelidikan Tingkahlaku Kesihatan, Kementerian Kesihatan Malaysia (KKM). Putrajaya.
- Shakirah Noor Azlan & Nurshafeeqah Mohd Zin. (2017). *Kesan Penglibatan Belia Malaysia dalam Keusahawanan Sosial*. Universiti Teknologi Malaysia (UTM), Skudai. Johor.
- Steven Eric Krauss. @Abd. Lateef), Haslinda Abdullah, Zuraidah Bte Ali, Ismi Arif Ismail, Dzuhailmi Dahalan, Shepherd Zeldin & Zaifu Ariffin. (2017). *Understanding Pathways to Malaysian Youth Program Engagement and Community Connectedness*. Institut Pengajian Sains Sosial (IPSAS), Universiti Putra Malaysia (UPM), Serdang. Selangor.
- Wan Ahmad Amir Zal, Hafizi Mat Salleh, Siti Asma Md Rasdi & Mohd Kamil Ahmad. (2017). *Strategi Pengurusan Kemiskinan Belia Nelayan Berasaskan Modal Komuniti di Kelantan*. Institut Penyelidikan dan Pengurusan Kemiskinan (InsPeK), Universiti Malaysia Kelantan (UMK). Kelantan.
- Wong Huey Siew & Lim Tien Hong. (2017). *Isu dan Cabaran Utama Belia OKU Penglibatan*. Open Universiti Malaysia (OUM). Kuala Lumpur.

Profil Penulis:

Zainah Shariff, PhD

Ketua Pegawai Eksekutif

Institut Penyelidikan Pembangunan Belia Malaysia (IYRES)

Syariffanor Hisham

Pengurus Bahagian Perancangan dan Penyelidikan

Institut Penyelidikan Pembangunan Belia Malaysia (IYRES)

Shariffah Mamat

Eksekutif Penyelidik Kanan

Institut Penyelidikan Pembangunan Belia Malaysia (IYRES)